

XVIII

no. 2

HARANGVE
DE L'AMATEVR
DE IVSTICE,
AUX TROIS ESTATS.

M. D. C. XV.

duplex
not catalog

DEPARTMENT

OF THE

LIBRARY

OF THE

CONGRESS

OF THE

UNITED STATES

OF AMERICA

WASHINGTON

1851

1852

1853

1854

1855

1856

1857

1858

1859

1860

1861

1862

H A R A N G V E

Del' Amateur de Justice,

AUX TROIS ESTATS.

C'est de vous (Messieurs) que nous esperons que la Iustice sera remise en la possession de son ancien patrimoine, d'ou elle a esté honteusement banie par ceux de nostre Siecle: c'est de vous que nous attendons le Restablissement de son ancienne Noblesse enfermée dās les coffres de l'ignorance, liée & garottée d'une chesne a la Persienne souuenés vous que c'est elle qui a fait autresfois florir toutes ces belles Republicques payēnes, dont vous aués tiré vos loix, celle de Rome, d'Athene, & de Lacedemone ne se sont elles pas perdues en la perdant: prenés garde qu'il n'éarriue autāt a la vostre, car elle commande a se lasser d'endurer, si vous ne dōnés ordre qu'elle ne soit remise en sa premiere splendeur. Pleust a Dieu que ceux qui sont pourueus de ses offices, sceussent bien praticquer ces belles leçons que Dieu leur a dictées par la bouche de ses Prophetes & Apostres. Iugés voyés ce que vous faictes, car ce n'est point le Iugement des hommes que vous exercés, mais celuy de vostre Dieu & selon que vous iugerés ainsi serés vous iugés, & derechef, faictes Iugement & Iustice, ou autrement i'ay iuré en moy que vostre maison sera deserte. Elles leur seroient fort faciles a mettre en vsage, s'ils auoient tant soit peu d'experience aux affaires, & suiuoient les loix: c'est a

dire si la loy dominoit, non pas eux la loy. Et la verité nous dirons, que la Republicque laquelle est la mieux ordonnée & policée, est celle en laquelle domine non tous indifferement ou plusieurs, ains celle en laquelle la loy seule domine: car elle n'est iamais poussée d'aucune affection, elle ne se courouce point, elle ne hait personne, elle n'est point saisie d'ambition, elle aime tous également & les fauorise, & tādīs qu'elle domine, elle n'édure point qu'aucun s'esleue par ambition, pour conduire le peuple a son plaisir, mais elle gouuerne sagement la Replublicque: c'est pourquoy le Iureconsulte Pomponius, l'appelle vne promesse & obligation commune de la Republicque; & Aristote qu'elle est le commun cōsentement du peuple, lequel ordonne par escrit comme chasque chose se doit faire ou non faire: ainsi aussi Ciceron, qu'elle ordonne ce qui est iuste & bon, & deffend ce qui est mauuais; a quoy s'accorde ce que dit le Iureconsulte Modestinus, que la force & vigueur de la loy est commander, deffendre, punir, & permettre. Et certes les Magistrats qui l'ont violée & violent encores tous les iours, doibuent bien penser que l'œil de la vengeance ne dormira pas tousiours. Ceux qui ont droit de iustice, comme plusieurs Seigneurs deburoient bien connoistre ceux lesquels ils cōmettent pour l'exercer: car de la vient vn grand bien a leurs subjects ou vn tres-grand mal ainsi donc (Seigneurs) lors que les offices des Iuges vacqueront en vos iustices, donnés les places de iudicature a gens qui en soient capables & dignes, vous serés les premiers qui en recepurés les

fruits, & vos subiects les seconds. Dauantage vous ferez voir a nos Roys la faute qu'ils font de vendre les Estats, voire des premiers de leur Iustice, & non seulement des Iuges & Iurisdicions Royales, & des Iuges Presidiaux, mais des Parlemens. Le Roy Louis douzieme en fit le premier l'ouuerture pour les Estats de la chambre des Comptes le Roy François apres l'a suiui, pour tous les Estats de iudicature, mesme des Parlemens: celui a qui nous nous ressentons tant redebua- bles d'auoir fauorisé les lettres en France. Et le Roy Henry le Grand, duquel les loüanges sont & seront a iamais espandues iusques aux derniers confins du monde, a la persuation d'aucuns qui luy presenterent les grands deniers qui luy en viendroient les a rendus fiefs, faisant financer par an aux Officiers le sixiesme de leur Estat. Miserables qui tiennent des charges a ceste condition, qui acheptent le temps qu'ils consomment a seruir d'une somme qu'il faut qu'ils gagnent pour la payer, & si par ce moyen en rendant les estats fiefs, c'est oster aux gens d'honneur le moyen de pouuoir seruir leur pays, & ouurer la porte aux ignorans, c'est a dire a ceux qui auront plus d'argent que de science. Helas ou est ce grand President la Vacquerie, pour nous en faire des Remonstrances, n'en naist-il point vn Phenix de ces cendres pour nous entonner icy les discours, & nous apprendre que ce n'est point l'or & l'argent qui maintiennent les Roys & leurs Estats: mais ces deux colonnes, la pieré & la Iustice. Heureux ceux qui ont tellement gouverné leurs Prouinces qu'ils n'ont laissé apres eux au-

6
cunvestige d'avarice & luxure. Rochers inacces-
sibles, forteresses imprenables & inexpugnables
& bouleuers de Iustice, quād aurons nous l'heur
que nostre Roy vous appellera par vos capacitez,
suffisances, bonnes mœurs, & grande experience
aux affaires : afin d'amacer toutes sortes de mo-
yens fort propres a tirer la verité du milieu des
tenebres, dircerner le iuste de l'iniuste, garantir
les vesues & les Orphelins de la foule & oppres-
sion des profanes & impies. Les reformatiōs cō-
mācēt quelquefois par les parties les plus basses.
doncques (Seigneurs) a quile Roy a concedé les
Iustices ne cerchés les officiers du Roy dans les
Iurisdicōtions, qui remplissent leurs sieges des ap-
pellations des sentences qu'il auront eux mes-
mes donnees, pour se faire recepuoir plusieurs
fois aux parties & y profitent en diuers temps :
ny admettés point aussi des Procureurs des Sie-
ges car ils n'auront quel'habit des Iuges, qui est
la robe qu'ils y porteront aux iours qu'ils iront
exercer leurs charges, & peut estre qu'encores ils
auront apprehension, d'enueloper leur ignoran-
ce d'une soutane & d'une robe : croyés moy cesōt
tous vautours enrobés, monstres bifformes, hor-
ribles & exerables, ayant bien au dehors la figu-
re d'hommes, mais en effect & au dedās, ce sont
de vraystoreaux, des loups affamés, des bestes
farouches & sauvages, qui se repaillēt incessam-
ment de chair humaine, escorchent le pauvre
peuple, le succent iusques aux entrailles, foulent
le iuste & l'innocent, tantost par faux contrats,
tantost par mutilations des registres, tantost par
concussions & exactionstres pernicieuses nous

voyons practiquer cela tous les iours a nostre
 grand regret, qui me meut de représenter icy les
 qualités d'un bon iuge, pour le choix que vous
 en ferez quand l'occasion s'en presentera aucuns
 ont depeint la Iustice couuerte d'un grand voile
 & sans yeux, en quoy il me semble qu'ils luy font
 iniure: car sur toutes choses celuy qui est iuge,
 doit auoir les yeux clairs-voyans, fermes & as-
 surez a la terreur des meschans: mais peut estre
 qu'ils ont voulu dire, que le Iuge ne doit se sou-
 cier des menaces, ny des prieres des grâds de ses
 parens, ny de ses amis, & qu'il doit destourner
 d'eux les lumieres chastes de la Iustice, de crainte
 que ses yeux ne soyent esbloüis & ne conuiët, par
 ce qu'il doit faire iugement du bien d'avec le
 mal, & des innocens d'avec les coupables, qu'il
 ne se laisse point corrompre, par les esperances,
 faueurs, proffits & telles autres especes de char-
 mes plus dangereux que ceux des magiciës, que
 leurs yeux ne soyent point surpris, constants &
 assurez comme ceux de Socrate, quand sans fil-
 ler il regardoit le soleil, c'est a dire, Dieu du chef,
 duquel la Iustice est neé, le gouuernail & cõdui-
 ste de laquelle il a commise au Iuge, ainsi qu'a
 Eneé son vaisseau a Palinurus, qui pour si peu
 qu'il se d'escouure de l'equite, tombera precipité
 entre les Syrtes & les rochers ses yeux aussi peu
 desirans que ses mains continantes ainsi que di-
 soit Pericles, habillé modestement d'habits de-
 cens a sa charge, incorruptible, au eugle aux pre-
 sents, qu'il soit tellemēt esgal enuers vn chascun,
 qu'il puisse iuger sans passion, & que la raisõ luy
 soit comme en la main le baston a l'auengle, du-

quel il tatonne s'il ny a point de pierre en son chemin contre laquelle il offence & blesse son pied: que selon Solon il aye les oreilles fort ouvertes, a celle fin des'accoustumer a ouir bien ou mal dire de luy, & ne fust esmeu des loüanges ou des medifances du vulgaire, & mesme quelquefois a la façon d'Ullisse, il se bouchat les oreilles de cire, & quelquefois d'estre sourd, mais non lors qu'il exerce la charge bref estre tel que Persele d'espeint en ces vers.

*Ille sciat iustum, gemina suspendere lance
Ancipitis libra, rectum discernat, ubi inter
Curua subit, vel cum fallit pede regula varo
Sitque potis nigrum vitio prefigere Theta.*

Au surplus, nous donnons aussi l'aduis de Ciceron en son Oraison pro Cluentio, *ne lēsum nimis etiā esse debere, ne litiū faciat immortalitē, neque frigidū nimis in delictis plectendis purgādaque scelestis hominib⁹ ciuitate*: mais no⁹ voulōs que le Iuge viue avec vne ame innocēte, qu'il n'apprehende point la peine, qu'il ne soit point paresseux, ny qu'il se laisse trop aller, qu'il ne se face aussi trop redouter, qu'il ne soit audacieux, mais bien temperé, qu'il ne soit trop precipitant, ne aussi trop estourdi, qu'il ne se laisse emporter a la collere, ny trop grande compassion, qu'il ne se laisse fleschir, qu'il soit tousiours ferme, qu'il ne se laisse suborner: bref qu'il soit aussi homme de biē & aussi sage que celuy lequel a peine Apollo peut il trouver entre mil. Quand nous le voudrons choisir, il ne faut point que nous ayons autrement esgard a sa parenté a son estre & creatiō: mais seulement que nous regardions s'il a esté

nourri

nourri & allaité du lait des mammelles de Justice, laissant les moyens qui ne sont que choses terrestres, caducs & perissables. Imitons ces anciens payens, lesquels estoient tous zelateurs de Justice, nela laissant point a l'abandon de qui la vouloit, ne l'exposioient point a l'ancan, comme nous semblons faire aujourd'huy a toute sorte de personnes, ainsi qu'une marchandise, dont on ne fait pas grand compte. Alexandre Seuerus Syrien de nation, bon Prince, guerrier, iusticier, pieux, & le premier Empereur Christicolle apres Adrian n'a iamais permis, ne voulu souffrir que les Estats de Iudicature se missent en vente, *neceffe est, inquit, vt qui emit vendat: ego non patiar mercatores potestatum, quos si patiar damnare non possim: Erubesco enim punire illum hominem qui emit et vendit.* Voila de belles parolles dignes certes d'un tel Prince, lesquelles peuuent seruir d'exemple a nos Roys, qui maintenant ne scauroient aujourd'huy punir iustement ceux qui ont charge sur un peuple, s'ils commettent quelque iniustice, par ce que l'on peut dire que ce sont eux mesmes, qui leur en donnent le subiect, metrans en vente leurs Estats de iudicature, les desliurants aux plus chers & derniers enchereurs, qui le plus souuent sont enfans de Marchans, qui n'auront iamais esté nourris en l'Eschole de vertu, & lesquels osent bien mettre tout leur auoir, ou bien peu s'en faudra en des Estats, pour exercer toute leur vie contre leurs consciences toutes sortes d'impietés, ne proposans, ne liberté, ne vertu pour leur but: ains seulement une conuoitise de cheuances, auoir, & richesses, laquelle n'a borne ne mesure quelconque, ne aucun assouuissement, non plus qu'un feu bien embrasé, ou un creux abis-

me de mer, l'un & l'autre insatiables de tout ce qui se peut mettre dedans. Mais le pis que ie voy, c'est que la pluspart d'eux, sont ordinairement alliés les vns avec les autres, de sorte que si quelqu'un d'eux a delinqué, il est impossible d'en esperer la punitiõ, & moins encores d'auoir Iustice, si on a quelque chose a desmesler avec eux, & si on en veut recuser vn, il faut par mesme moyen recuser tout le siege, cõme nous voyons cela arriuer souuent. Es Estats du pais de Languedoc tenus a Montpellier, en l'an mil D.lvj. il fut arresté de remonstrer au Roy, qu'il luy plüst ordonner, que les proches parens & alliez ne fussent admis en mesme siege ny en mesme court: Et quatre ans apres, les mesmes remonstrances furent faictes au Roy, par les Estats de France tenus à Orleans, mais il est impossible d'y remedier maintenant, rant que les Estats soient perpetuels, & conserués par la Paulette. Il y a deux cents-cinquãte ans & plus que le Roy Charles cinquieme, & auparauant luy Philipe le Bel, auoient ordonné que nul ne fust Iuge au pays de sa naissance, conformement a l'Edict de Marc Aurele, lequel ordonna que nul ne fust Gouverneur de son pays, ce qui fut depuis estendu aux conseillers assesseurs & Gouverneurs des Prouinces, & fut tres-biẽ executé: comme il est encores en Espagne, & en la pluspart des villes d'Italie, le iuge ordinaire est estrange. Il y a quelque temps qu'aux Estats de Poulougue, les Ambassadeurs de Moschouie requierent la mesme chose: mais l'ordonnance de nos Roys a esté tost enseuelie. Et sans chercher les Edicts des Empereurs Romains, ne lisons nous pas dans les memoires de Cesar, que les aneies Gaulois, & mesmes ceux d'Autun auoient vne loy inuiolable, qui

deffendoit que les Magistrats fussent continués plus d'un an & que deux d'une famille ne peussent estre Magistrats, ny Senateurs ensemble, ny l'un tant que l'autre qui l'auroit esté viuroit. D'auantage la chose qui plus doit estre recommandée a tous subiects en general, & a chacun en particulier, est la conseruation du bien public. Et quel soing, quel soucy du bien public, peuuent auoir ceux qui ny peuuent auoir aucune part? commēt auront ils soing de ce qui ne leur touche ny pres ny loin? Et si quelque homme de bien veut dire, faire & entreprendre quelque chose pour l'vtilité publique, estant priué qui l'escouterà? qui le supportera? qui le favorisera? les histoires nous apprennent, que presque tous les Estats populaires ont esté changés en Monarchies, pour auoir donné les charges & commissions plus long temps qu'il n'estoit besoin: comme a Pisistratē en Athenes, a Phidon en la ville d'Argos, a Cypsele en Chorinte, a Denys en Syracuse: a Panece en Leonce, a Phalaris en Ionie: & sans aller si loin d'ou sont venus tous les Princes & Seigneurs d'Italie, sinon que de la: ainsi que ces iours passés nous l'auions fait voir en certaines remonstrances. Ce que preuoyant le dictateur Aemilius Mamercus presenta requeste au peuple, qui passa en force de loy par laquelle il fut ordonné que la censure des lors en auant prendroit fin en dix-huict moys, qui estoit establie pour durer cinq annees, & le iour suiuant il deposa la dictature ne la voulant continuer plus d'un iour, & adiousta ceste raison, *ut Sciatis quam michi diuturna imperia non placeant*, Et a peu de temps de la, nous lisons que le tribun Gabinius fut tué en plein Senat par les Senateurs mesmes (comme nous lisons en Dion) pour auoir

faict decerner a Pompée la commissiō de la guerre
 Piraticque pour cinq ans : & rend la raison pour-
 quoy il est fort dangereux d'octroyer les charges
 honorables trop long temps, par ce (dit il) que le
 naturel de l'homme est tel, qu'il mesprise vn chas-
 cun, & ne peut viure en subiect, depuis qu'il a long
 temps commandé: c'est ce que dit Cassiodore quasi
 en mesme sens, *antiquitas voluit prouinciarum di-
 gnitatem annua successione reparari, ut nec diutina
 potestate vnus insolesceret, et multorum prouectus gau-
 dia reperirent.* Et peut-estre que ce fut l'vn des plus
 grands moyens de conseruer l'Estat de Assyriens &
 Persans, qui tous lesans changeoint de Capitaines
 & Lieutenans. Et cependant aujour d'huy nous vo-
 yons que les enfans par le moyen du droict annuel,
 sont maintenus & gardés en la possession de Estats
 de leurs peres, quelle folie ie vous prie le pere peut
 estre sera meschant & sçauant, & le fils ignorant se-
 ra en sa place, de sorte que tous les iours nous tōbons
 de fiebure en chaud mal, de dire qu'il ne sera receu
 s'il est ignorant, c'est s'abuser: veu qu'autant en
 pend a l'œil de ceux qui le reçoient ayant peut
 estre des enfans de telle Cathégorie, qu'ils veulent
 pouruoir semblablement auant ou apres leur mort.
 O que les republiques sont heureuses quand el-
 les sont gouuernées par gens de bien, prudents, &
 sçauans: car ou la sapience est, la iustice ne s'en peut
 pas esloigner, & ainsi il ne s'y peut rien faire d'in-
 iuste, ny de Tirannie; mais ou l'ignorance est, & le
 deffaut d'experience: ce ne sont qu'arrogances, au-
 daces, praticques de toutes choses contre tout droit
 & raison (ce qui estoit reproché aux Atheniens vn
 ardent desir & appetit insatiable de gain) tout y est
 en desordre, d'autant que si le Iuge ignorant ayme

aujour d'huy quelqu'un il le favorisera mais si le len-
 demain il le luy a fait la moindre offense, il le con-
 dânera, & n'y a aucû qui ne puisse faire de telles fau-
 tes, s'il est ignorât des loix & des sciences, & qu'il ayt
 ceste opinion d'estre la loy mesme de cela qu'il a
 puissance de iuger. Certes le gouuernement de tels
 Iuges & Magistrats est tres-dangereux, par ce que ils
 foulent les plus nobles & mesprisent les vertueux
 & sçauans, les vns estants poussés d'amour, de hai-
 nes, d'animosités, ou de quelques affections particu-
 lieres, les autres d'esperance, de crainte, d'ambition,
 ou d'auarice iugent le plus souuent ce qui est ini-
 que, & ainsi ils ne sement toute leur vie (comme dit
 le sage) que peruersité, mais aussi ils doibuent sça-
 uoir qu'ils en moissonneront le tourment, & que
 la verge de leur indignation prendra fin. Vous au-
 rés donc (Messieurs) assés d'affaires aux Estats, si
 vous voulés apporter vne reformation a la Iustice,
 que de parler de tels officiers, telle corde merite bié
 d'estre touchée & à besoin d'estre mise en bon ton,
 vous trouuerrés assés en France à qui commettre le
 maniement des affaires, nous auons encores Dieu
 merci bon nombre de personages, doctes & ver-
 tueux, nos Prouinces, nos villes, vous en fourniront
 assés, Estant chose certaine & sans doubte, que de
 gens de bien & entiers il ne sçauoit sortir, ny es-
 clorre autre chose que de bõs cõseils & aduis. Nous
 trouuerrons si nous voulons des Fabrices, des Pu-
 blicoles, des Curies, des Calatins, des Cecinnatés,
 des Atrilles, pour les faire asseoir sur le trosne de la
 Iustice, & lesquels prefereront tousiours leur par-
 ticulier au public. Helas bon Dieu! ne sçaurions
 nous voir vne telle reformation en nostre pauvre
 France, n'aurons nous iamais cét heur que de voir les

Estats non plus venaux. C'est de vous (Messieurs)
 que despendent telles affaires pour le bien de l'E-
 stat, C'est a vous de remonstrer au Roy les maux
 que nous endurōs tous les iours de ce costé là. Vous
 voyez comment ceux d'aujourdhuy a cause de la
 charté de leurs offices, vendent la Iustice, vendent
 les Republiques, védēt le sang du pauvre peuple,
 vendent les loix. aussi, & conséquēment ostent les
 loyers d'honneur, de vertu, sçauoir, pieté & de Re-
 ligion, ouurants en plein iour la porte aux larcins,
 aux concussions, à l'auarice, Iniustice, ignorance a
 l'impiété & a tous vices & ordures. Voila en vn
 mot que c'est que de la pluspart de nos iuges, & des-
 quels Horace a tres-biē sceu dire. *Male verum exa-*
minant omnes corrupti iudices, ie dicts la plus part,
 car ie ne doute point qu'il ny en ait encores d'en-
 tre eux, qui regrettent de voir telles choses; mais
 quoy: que peut faire vn petit nombre, entre tant
 de corrompus, sinon que d'auoir recours a Dieu,
 & le prier d'auoir pitié de son peuple desolé, affli-
 gé, foulé, & ruiné par ceux qui ont l'autorité
 sur luy. ou bien auctorisent ceux qui commettent
 telles impietez, sans se soucier du iuste, sans sup-
 porter la veufue, l'orphelin, sans reprimer l'insolen-
 ce des vns & des autres, sans guerdonner la vertu
 & integrité de ceux qui le meritēt. C'est on a propre-
 ment parler torrens de nature desbordée & acces-
 siue lesquels apres auoir rompu la leuée d'equité
 & de bonté, viennent à s'espandre parmy les cam-
 pagnes, rauager pour vn temps les semences de
 iustice, atterrer ses moissons toutes entieres, iusques
 à ce que finalement ils se vont perdre & precipiter
 dās cēt abisme espouuētable duquel parle Virgile.

tenent media omnia Silua

Cocitus-que Sinus Labens circumfluit atro.

Par faute de voir bien à l'œil ceste iustice diuine, laquelle auec des yeux en plus grand nōbre qu'Argus, penetre au dedans de leurs pensées profanes, & à la mienne volonté que ces gés la se voulussent vn peu arrestera cōsiderer, qu'elle a esté ceste iustice si curieusement obseruée par le paganisme, ils ny trouueroient que toute équité & droiture, nous en auons encores leurs loix, lesquelles sont plus diuines qu'humaines. D'auantage, s'ils vouloient s'enquerir ou est ce grand Alexandre ce grand Cesar, ce grand Charlemagne & tant d'autres Roys, ils seront estonnés de se souuenir quels ont esté leurs Estats, ce Lyrique payen a bien chanté leur honneur.

*Nullus argento color est avaris
Abdite terris inimica Lamna
Crispe salusti nisi temperato
Splendent usu.*

Qui consistoit principalement en effects charitables, l'vn desquels & le principal estoit d'auoir l'affection vers les pauvres, les soustenir, & par aumosnes releuer leurs necessités; ainsi en doibuent vser ceux qui ont auctorité sur vn peuple, escouter la plainte d'vn pauvre plustost que celle d'vn riche, c'est a dire le preferer sans tant le faire demeurer a leur porte, non tant soubz esperance de gaing que pour l'amour de la vertu: imitans en cela Traian ce grād Empereur Iusticier, lequel est a bō droit loüé des historiens, de ce qu'estant à cheual pour aller a la guerre, il mit pied a terre pour oüir la plainte que luy vouloit faire vne pauvre femme. Bel exēple certes pour ceux qui se mettent de gouver-

ner la iustice, lesquels s'ils veulent faire le semblable, cest a dire s'ils sont amateurs d'equité & zelateurs de iustice, ils doiuent auoir esperance certaine de ne mourir iamais que pour viure dans le Ciel. Pour conclusion suiuous tousiours la iustice, reestablissons-la comme elle estoit du temps de nos anciens peres, embrassons la, sans en iamais quitter la prise, a l'exemple de ces grands personnages Payens, lesquels bien qu'ils n'eussent le vraye cōnoissance de nostre Dieu: routesfois il s'est seruy deux, pour faire admirer sa bonté & iustice, par des gens bien verses, & qui ont laissé apres eux vne memoire eternelle de leurs actes vertueux a tout le genre humain faisons eslection de gens suffisans & capables, soit en exemple de bonne vie pour l'administrer: n'allons point chercher ceux qui n'ont que la bourse en la main & rien autre chose pour leur donner des charges, afin de se faire bonneter, craindre sans raison, & exercer toutes sortes d'impietés mais ceux-la tant seulement *Quorum Spectata et nobilitata virtus non solum natura coroborata, sed etiam disciplina putabatur*, & lors ce sera la vraye guerison del'Estat, ny ayant rien plus necessaire en ce monde, que de bons officiers doüés de science & sagesse, afin de bien conduire & ordonner la vie humaine a sa propre & heureuse fin, & lesquels seront curieux de rapporter tout leur soin & industrie, pour la conduicte d'icelle, au bien & vtilité publique, afin d'en remporter aussi pour eux mesmes, vne loüange, gloire. & reputation immortelle.

F I N.

Ce bref où le pape Paul V sollicite le
clergé & la noblesse d'avoir unifié le
Candide & du Feroz, ou sa résistante
-Voté de la Vierge, dit "loi fondamentale
de l'Etat", très entendue, authentique.
La réponse qui le suit est peu de
chose.

(S. Le Vierge. Histoire de
Louis XIII. in-4^o. t. I. p. 351)

...général et réputation immortelle.

FIN.